

## PROPERTII

oscula suspensis instabant carpere palmis,  
oscula et alterna ferre supina fuga.

ille sub extrema pendens secluditur ala  
et volucres ramo submovet insidias.

30

iam Pandioniae cessit genus Orithyiae:

Ah dolor! ibat Hylas, ibat Hamadryasin.  
hic erat Arganthe Pege sub vertice montis

grata domus Nymphis umida Thyniasin,  
quam supra nullae pendebant debita curae

35

roscida desertis poma sub arboribus,  
et circum irriguo surgebant lilia prato  
candida purpureis mixta papaveribus;

quae modo decerpens tenero pueriliter ungui  
proposito florem praetulit officio,

40

et modo formosis incumbens nescius undis  
errorem blandis tardat imaginibus.

tandem haurire parat demissis flumina palmis  
innixus dextro plena trahens umero;

cuius ut accensae Dryades candore puellae

45

miratae solitos destituere choros,  
prolapsum leviter facili traxere liquore:

tum sonitum rapto corpore fecit Hylas.

cui procul Alcides iterat responsa, sed illi  
nomen ab extremis fontibus aura refert.

his, o Galle, tuos monitus servabis amores  
formosum Nymphis credere visus Hyllan.

50